

13

00

M n 1 (13)

(aufg. 19 Tafel.)

Christlicher Sendbrieff 8.

An alle frome Christen/

die vmb der Evangelischen Wahrheit willen
verfolget / geplaget vnd verjaget
werden/

Sampt bericht vom Abfall vnd Verleugnung/
was daran für grosse Sünde geschehe/ 2c.

Hievor geschrieben

An die Christen im Land zu Francken/in der Verfol-
gung Anno 1588. durch M. Alexander Binger/
Pfarrern am Berge zu Schmalkalden/

Jetzt aber auff's new in Druck gegeben/

Mit einer Vorrede an die bedregten Evangelischen
in Böhmen/ Mähern/vnd dergleichen Orten/

Durch

D. Vincentium Schmuck/ Pfarrern/ Professorn
vnd Superintendenten zu Leipzig.

Esaiæ 35. cap.

Stercket die müden Hende/ vnd erquicket die strauchelnden Knie. Saget den verzagten
Hertzen/ Seyd getrost/ fürchtet euch nicht/ Sihe ewer Gott der kömpt zur Rache/
Gott der da vergilt/ kömpt vnd wird euch helfen.



Leipzig/ In verlegung Thomæ Schürers S. Erken.

Bedruckt bey Friederich Lanckisch. 1622.

Handwritten text in a historical script, likely Gothic or similar, appearing as bleed-through from the reverse side of the page. The text is arranged in several paragraphs and includes a prominent heading that reads "D. Vincencium" (D. Vincenz). The script is dense and characteristic of late medieval or early modern manuscripts.





Vorrede.

Allen vnd jeglichen im Kö-
nigreich Böhmen / Marggraffthumb
Mähern / vnd andern dergleichen Orten / we-
gen der Augspurgischen unveränderten Confession jehis-
ger Zeit bedrängten / vnd ober der Abschaffung
ihrer reinen Lehrer vnd Prediger betrüb-
ten Christen.

Wünsche ich die Gnade Gottes / Trost vnd Friede des Her-
zens / vnd des Glaubens beständigkeit / durch Krafft vnd Wirkung
des H. Geistes / in Christo Jesu zuvor.

Alterliebste in Christo / Got-
tes außergeählte vnd geheilig-
te / wir erfahren mit schmerzen /
waser massen die der Römischen
Keyserlichen Majestet / vnserm
allergnedigsten Herrn / in recuperirung dero
Königreiche vnd Landen von Gott verliehene
Victoria, vnd bißher gehabter success von den
Feinden Evangelischer warheit / genannten
Geistlichen Catholischen / vñ zumal dem vnrubi-
gen Geschmeiß / der Jesuiten / dahin wil gemiß-
braucher vnd gedeuter werden / als ob daraus

A ij

in

Vorrede.

in der That zu spüren vnd zu erkennen/nicht allein wie Gott der ordentlichen Gewalt beystehe / vnd demnach höchstgedachte Röm. Keyf. Maj. einen rechtmessigen Krieg (welches denn dieses Orts nicht gestritten wird) wider dero vnghehorsame gefüret habe / sondern auch / daß die Römische von ihnen genante Catholische Religion müsse gewiß die einige vnfeilbare ware Religion vnd seligmachende Lehre seyn / weil Gott dermassen Zeichen gethan / vnd die Kezer (wie sie alle die jenigen / so vom Papsthum abgetreten sind / zu nennen pflegen) also gleich augenscheinlich geniedriget vnd gedempffet habe. Dannenher sie nicht genügen haben / daß die hohe Obrigkeit mit Weltlicher Straffe / wider die von derselben erkante Verbrecher verfehret / sondern sie meynen auch / es müsse dieser Sieg vnd verliehene Gewalt insonderheit wider die Evangelische Kirchen / dero Lehrer vnd Prediger / vnd alle dem reinen Wort Gottes vnd Augspurgischer Confession zugethane Christen / in denen zu Keyserlicher Majestet devotion wiedergebrachten Landen vnd Orten / (ja wol im ganzen Römischen Reich / wie sie ihnen die Rechnung vermessenlich ma-

Vorrede.

machen / vnd solches nicht allerdings heel haben zu vertreibung / außrottung vnd vertilgung derselben stracks lauffs angewendet werden. Vnterlassen demnach nicht / Tag vnd Nacht dahin zu trachten / auch alle Weltliche Oberkeiten anzuhengen / damit solches ehestes ins Werck gerichtet / vnd nur weidlich an die Lutherische Prediger vnd Evangelische Bekenner gesehet werde / inmassen offenbar / daß sie numehr auch zu Prag / in der Königlichen Hauptstadt / die Deutsche Evangelische Kirchen gesperrt / die Prediger abgeschafft vnd außgewiesen / de Buchfürern alle Lutherische Bücher außser Landes zu schaffen geboten / vnd also des vnd anderer Orten / da sie desgleichen gethan / den HErrn Christum mit seinem Evangelio gar Landreumig gemacht zu haben vermeynen.

Ob nu dannenher / daß Gott Keyserlicher Majestet / derein dieser expedition gleichwol auch Christliche Lutherische Chur vnd Fürsten auß trewer Pflicht als dero Haupt vnd hoher Oberkeit / nicht geringen Beystand geleistet / Sieg verliehen / zu schliessen sey wider die Augspurgische Confession / vnd Lutherische reine Religion / als ob die hiedurch von Gott selbst

Vorrede.

verdammet vnd vnrecht gesprochen / vnd nit
mehr außzurotten / oder auff's wenigste in 3.
Keyf. Majestet Landen nicht zu dulden sey / daß
wil noch eines weiten discurses / guten reumi-
gen nachdenckens / vnd starcken beybringens /
welches aber vnser erachtens vnmüglich seyn
wird / von nöten haben. Vielweniger wil da-
raus folgen / daß dem H. Ern Christo / den die
Lutherische Kirchen / wie offenbar / rein vnd
trewlich lehren / ehren vnd bekennen / ein solcher
Danck zu vergelten seyn wolle / dadurch sein
Reich vnd Wort gehemmet / vnd seines Evan-
gelij Christliche ware bekennen / aus Städten
vnd Landen / darein sie für dessen / mit reiffem be-
dencken vnd gutem vorwissen der hohen Obri-
gkeit eingenommen / vnd ihnen Schutz vnd Frey-
heit zugesaget / exterminirt vnd gejaget werden
müssen. Ist im gegentheil vielmehr zu besor-
gen / so mans an diesem Ort angreifen vnd also
verfahren wolte / es möchte sich das Blat wen-
den / vnd durch Gottes Verhengniß / vnd vn-
versehene Mittel / wol einen andern Ausbruch
gewinnen / als man vermennet hette / wie denn
Gott wunderbarlich ist in seinen Wegen / vnd
kan solche genge gehen / dere man sich nicht ver-
sehen

Vorrede.

sehen hette / zumal wenn man in terminis nicht
bleiben / sondern eines verliehenē Sieges künze-
lich mißbrauchen / vnd vnnötige Sachen anhe-
ben wil / wie dem König Umasia geschach / davon
2. Chron. 25. zu lesen ist.

Man lesset aber dieses jeko an seinen Ort /
vnd zu derjenigen Oberkeiten / die sich von den
Jesuiten vnd ihres gleichen Lermenblasern der
massen einnehmen / anhezen vnd bereden lassen /
Gewissen vnd verantwortung gestellet seyn.

Difmal / weil es nu die wege bey euch er-
reicht hat / daß ihr ewrer Prediger zum theil be-
raubet seyd / zum theil noch teglich in der gleichen
Surcht sitzen müisset / vnd darauff erwarten / was
man auch mit euch vornehmen werde / ob man
nicht an euch mit gewalt auch setzen / vnd euch
entweder zu öffentlicher verleugnung der E-
vangelischen Wahrheit / vnd annehmung Pöp-
stischer Grewel dringen / oder durch allerley be-
redung darzu anreizen / oder so ihr bestendig
bleiben woltet / mit harter Drowung / mit Ge-
fängniß / mit außgebieten / beraubung ewer
Güter vnd anderer Drangsal verfahren möch-
te / wie denn die Exempla anderer ewer Glau-
bensgenossen / denen also mitgefahren / vor
Au-

Vorrede.

Augen/ vnd hiebey zu besorgen/ es möchten viel
vnter euch bey solchem Zustand zu rück sehen /
vnd auß blödigkeit vmb gedrewter gefahr wil-
len / etwan ein solches thun / das sie darnach
ewiglich gerewen möchte: Als sind wir euch
vnser theils nicht allein mit Christlichem mit-
leiden / sondern auch mit Gebet vnd gebürlicher
Sorgfeltigkeit von Herzen zugethan / vnd er-
achten vns schuldig / wo wir euch tröstlich vnd
rätlich erscheinen können / zumal / damit ihr zu
einem rechten Christennut vnd beharrlicher
Frewdiger Bestädigkeit im Bekenntnis der Ev-
angelischen Wahrheit erwecket / vnd darin ge-
stercket werdet / das wir dasselbe billich keines
weges vnterlassen.

Vnd weil in solchen Fällen / Christliche
Brüderliche Vermahnungen vnd Tröstungen /
die wir einander / wo nicht mündlich / jedoch
schrifflich thun vnd mittheilen können / ihren
sonderlichen effect vnd Nachdruck durch Gottes
Gnade zu haben pflegen / als wil ich auch mei-
nes theils euch hiemit gebeten / erinnert vnd im
Herrn vermahnet haben / ihr wollet euch so in
vnd gegē solchem Zustand nicht weich noch klein-
mütig finden / noch durch einigerley wege oder
bere-

Vorrede.

beredung zu den Pöbstlichen Greweln abzufallen / vnd derselben euch theilhaftig zu machen / bewegen lassen / sondern ewren HErrn Christum / vnd dessen erkandte Evangelische Wahrheit / darinnen ihr bisz daher trewlich vnterwiesen / vnd billich satten Grund derselben solt ge-
leget haben / bestendiglich lieb haben / bey ihm beharren / sein Wort frewdig bekennen / vnd darüber / wenn es von nöten ist / nicht allein Hab vnd Gut / Ehr vnd Wolstand / sondern auch / so es seyn solte / Leib vnd Leben zuzusehen bereit seyn / vnd keine Verleugner geben / in betrachtung des Worts des HErrn / do er saget / wer mich bekennet für den Menschen / den wil ich bekennen für meinem himlischen Vater. Wer mich aber verleugnet für den Menschen / den wil ich auch verleugnen für meinem himlischen Vater / Matth. 10. Vnd abermal / Wer verlesset Häuser / oder Brüder / oder Schwester / oder Vater / oder Mutter / oder Weib / oder Kinder / oder Ecker / vmb meines Namens willen / der wirds hundertfeltig nemen / vnd das ewige Leben ererben / Matth. 19. Item / Sey getrew bisz in den Tod / so wil ich dir die Krone des Lebens geben. Apoc. 2. Auff das ihr sagen könnet
B mit

Vorrede.

mit S. Paulo / Ich hab einen guten Kampff gekempffet / ich hab den Lauff vollendet / ich hab Glauben gehalten / 2c. 2. Tim. 4.

Vnd bey diesem Stück / was ihr aus Gottes Wort weiter vnd mit mehrern zu erinnern / vnd für euch zu bedencken habt / euch zu bekrefftigen in beständigkeit des Glaubens / vnd vor schendlichem Abfall zu bewaren / das ist in folgendem ieko vor 35. Jahren an die dazumal verfolgte Evangelische Christen im Bisthumb Wirzburg / von weiland Herrn M. Alexandro Binger Pfarrer zu Schmalkalden / in meinem Patriâ geschriebenen / vnd selbiger Zeit in meines Vaters seligen officina Anno 1588. alda in Druck gegebenem Sendbrieff / auch angehengtem Bericht von dem Abfall / 2c. fleißig verfasst vnd zusammen getragen / dergestalt / daß es schwerlich zu verbessern / noch deutlicher für die Augen zu stellen.

Habe dero wegen gewünschet / weil der Autor selbst von Gott bittet / es möchte das exempel der damaligen vertriebenen vnd beständigen Christen in Francken / vielen andern inskünfftig auch zu gut komen / daß ihr solch Send schreiben vñ Tractat in jetzigem ewrem Zustand
auch

Vorrede.

auch zur hand haben/ vnd euch dessen fruchtbarlich gebrauchen möget. Derwegen die anordnung geschehen/ daß es alhier auff's new wiederumb auffgeleget worden/ auch an vnserer Zuhörer/ so vnter euch bekante haben mögen/ vermahnung gethā/ euch dasselbe zuzufertigē. Vnd ich meines theils wil euch solche schrift durch diese kurze Vorrede in sonderheit commendiret vnd befohlen haben/ mit bitte/ wollet sie nicht allein lesen/ sondern auch wol beherzigen/ vnd euch darauff also erzeigen/ wie euch der H. Geist darinnen selbst weiset vnd anfüret. Ungezweiffeltes vertrauens/ so ihr deme also folgen werdet/ ihr werdet dasjenige thun/ darā ewers Gewissens sicherheit/ vñ nehest der Ehre Gottes/ ewrer Seelen ewige wolfarth vnd seligkeit gelegen seyn wird. Vnd daß dieses geschehe/ das verleihe euch Gott der Vater vnseres H. Erren Jesu Christi/ durch den Geist des Trostes vnd bestendiger Hoffnung/ vmb desselbigen seines lieben Sohns willen/ gelobt vnd gepreiset in ewigkeit/ Amen. Datum Leipzig den 12. Novembris Anno 1622.

Vincentius Schmuck D.

B ij

Ein

Ein Christlicher Sendbrieff / etc.

Den Auserwähltesten Freun-
den vnd lieben Kindern Gottes: Den
Ehrvesten / Achtbarn vnd Namhafften / allen
im Stiffe Würzburgk vmb des rechten Glaubens
willen geplagten vnd versagten
Christen /

Wüntschet M. Alexander Brzinger / Pfarrherr am Berge zu
Schmalkalden / von Gott dem Vater vnsers H. Erren Jesu Christi /
des Namen vnd Wort sie bekennen / durch den heiligen Geist Trost /
Friede / Freude vnd beständigkeit / biß ans ende / zu ihrer Selig-
keit / Amen.

Auserwählte Freunde vnd Kin-
der Gottes: Ehrveste / Achtbare vnd
Namhafftige / günstige liebe Herrn vnd
Brüder in Christo: Wiewol ich nicht viel
d. r ewren kundschafft habe / so ist doch mein
Hertz gegen euch allen zugleich von wegen ewer trewen stand-
hafften Bekendniß vnsers rechten waren Glaubens / mit
Christlicher Brüderliebe / Hulde vnd Gunst dermassen er-
füllet / daß ichs nicht lenger hab lassen können / ich habe euch
mit meinem Christlichen Kuß vnd Gruß müssen besuchen /
vnd mein wolmeinend Gemüt durch einen geistlichen Trost
vnd Vermahnung eröffnen / Demnach dienstliches fleisses
bittende / ihr wöllet solches von mir in allem guten / wie es fürs
genommen / vermercken vnd auffnehmen.

Anfenglich aber sol ich euch nicht verhalten / daß alle
rechte Christen mit mir sich vber euch hoch freuen / vnd Gott
ren

von Herzen dancken / daß er euch durch seinen heiligen Geist
die Krafft verliehen vnd gegeben hat / daß ihr vmb seines Na-
mens vnd Worts willen euch erwegen / allerley beschwerung
vnd verfolgung zu erdulden / Vnd bitten ferner andechtige-
lich / er wolle euch ja auch hinfürder mit gnaden stercken / er-
halten / vnd ewer Elend vnd Not zu seiner rechten zeit barm-
herziglich wenden. Dessen (sage ich euch zu) habe ich ge-
wisse Kundschafft vnd gute erfahrung / daß ich wol sagē möch-
te / vnd wolte gar nichts dran liegen / Es gienge bey vns vnd
an allen Orten / da das heilige Evangelium öffentlich gepre-
diget wird / vnd ewer anliegen den Christen bekand ist / der sel-
lige Wunsch vnd Segen vber euch alle Tage reichlich / den
die frommen Jüden zu Jerusalem im Jüdischen Lande ihren
Brüdern / in Egypten zerstreuet / zur Macabeer zeiten zu-
entboten / als sie dieselbigen zur neuen Kirchweyhe luden /
vnd ihnen auff diese weise zuschrieben / 2. Mac. 1. Wir Jü-
den / ewre Brüder / so zu Jerusalem vnd durch das ganze Jü-
dische Land sind / wünschen euch Jüden / vnsern Brüdern /
so in Egypten sind / glück vnd Heil: Gott segne euch /
vnd gedенcke an seinen Bund / den er Abraham /
Isaac / vnd Jacob / seinen trewen Knechten / zuge-
saget hat / vnd gebe euch ein rechtschaffen Hertz /
daß ihr in seinem Gesetze feste vnd bestendig bleibet /
vnd verleibe eu v / daß ihr fleissig seid in seinen Ge-
boten / vnd tröste euch / Er erhöre ewer Gebet / vnd
sey euch gnedig / vnd lasse euch nicht in der Noth.
Also bitten wir stets für euch zc.

Solches aber solt ihr nicht für eine geringe wolffahrt
achten. Denn ihr müßet sein gewißlich genießten / das wer-
det ihr erfahren / beydes zu Leib vnd Seele / vnd wird nim-
mermehr ledig abgehen / noch fehlen. Denn Gott lesset sei-
ne Gleubigen nicht vergeblich bitten vnd segnen / sondern hat

sich mit aller seiner gnaden vnd Güte ihrem Willen ergeben/
vnd solches den Propheten David klar rühmen vnd vertrö-
sten lassen: Voluntatem timentium se faciet, Er wird
thun / was die so ihn fürchten / nur haben wollen /
oder / er thut was die Gottfürchtigen begeren / Ps.
145.

Darumb habe es nur für einen Schatz / vnd wartet alle
Tage in guter zuversicht vnd Hoffnung auff die Krafft vnd
Frucht solches Segens / sie wird sich gewißlich finden vnd
eugnen / des solt ihr keinen zweiffel haben.

Darnach / ob wol das Werck selbst außweiset / daß euch
Gott durch seinen heiligen Geist beystehe / erleuchte / regiere
vnd tröste / weil ihr lieber das Land sampt ewern Gütern vnd
Heußlicher Narung eine zeitlang lassen / als Christum vnd
sein heiliges Evangelium habe verleugnen wollen. Denn
solches ist in keinem wege Menschen Werck / sondern lauter
Gottes Krafft vnd gabe. So mercket vnd spüret man doch
darneben auch an ewer etlichen / daß es euch die lenge fast
schwer wil ankommen / vnd schwer eingehen / daß ihr endlich
noch also gar solt abscheiden. Denn ihr drehet euch nicht
vergeblich so lange umb das Nest / daraus ihr verscheycht
send / vnd suchet noch immerdar daselbsten wiederumb einzue-
kommen.

Wenn ihr vollkommen weret / so würdet ihr euch die sted-
te / da der Antichrist herrschet / nicht so gar lieb seyn lassen /
ob ihr gleich viel vnd gros Gut daselbst hattet / sondern wür-
det gedencken / vnd sagen wie David: Ein Tag in deinen
Vorhöfen ist besser denn sonst tausent. Item: Ich
wil lieber der Thür hüten im Hause des **HERN**
meines Gottes / denn lange wohnen in der Gottlo-
sen Hütten / 22.

Vand dieses ist eben / darauff ich dis gegenwertige
Schreib

Schreiben / jeso in sonderheit zu richten gedacht habe / daß
ich nemlich den jenigen / so zum scheiden etwas blöde vnd
schwer sind / durch Gottes Gnade möchte ein Herz einreden /
daß sie kecke würden / im Namen Gottes / weil es nicht an-
ders seyn wil / sich endlich drein zu geben vnd hinzuziehen /
ihres Volcks vnd ihres Hauses vergessen / Psal. 45.

Die frewdig darzu gewesen sind / vnd habens allbereit
gethan / bald da man sie mit Ernst gejaget / nach dem Wor-
te Christi: Wenn man euch in einer Stadt verfolget /
so fliehet in eine andere: Die lobe ich / vnd dancke Gote
ihrenthalben vnd mit ihnen von Herzen / weis auch daß sie
es nimmermehr weder in diesem noch in jenem Leben gerewen
wird.

Die sich aber bishero noch auffgehalten haben / die vers-
dencke ich wol darumb nicht gros / daß sie nachgelassene mit-
tel vnd wege gesucht / ob sie sich könten erhalten: Aber ich
bitte sie gleichwol darneben auch vmb Gotes willen / sie wol-
len ihnen ja ihr Heymath vnd Güterlein auch nicht gar vber
die massen zu lieb vnd angepicket seyn lassen / daß sie sich stet-
tigs also zu rücke darnach umbsehen. Denn solches ist vber
alle massen gefehrlich. Der Herr Christus hat nicht vers-
geblich gesaget: Wer die Hand an den Pflug leget /
(daß ist / wer sich an das Bekenntniß einmal ergeben hat)
vnd sihet zu rücke / der ist nicht geschickt zum Reich
Gottes. Vnd die Engel sagten zu Loth / als sie ihn mit
seinem Weibe vnd Töchtern aus Sodoma füreten: Erret-
te deine Seele / vnd sihe nicht hinder dich / vnd stehe
nicht in dieser gantzen gegend / Gen. 19.

Wenß gescheiden seyn sol / daß man davon sol vnd muß /
so ist das beste / man vergesse alles was man zu rücke lesset /
vnd nicht mitbringen kan. Vnd sehe auch gar nicht auff
andere / sie gehen gleich mit / oder bleiben dahinden. Denn
es

es muß in diesem Fall ein jeder auff sich selbst achtung geben /
daß er sich halte wie sichs gehöret / Gott gebe wo andere blei-
ben.

Lieber Herr Gott / ist doch anderswo auch gut Brod
essen.

So seid ihr Gott ja so nahe an andern orten / ihr seid
gleich in der Welt wo ihr wollet / als im Stifte Würzburgk /
oder im Lande zu Francken.

Was schadete es doch dem lieben Patriarchen Abrah-
ham / daß er die Stadt Ur / vnd das Chaldeische Land beges-
ben vnd lassen mußte / nach Gottes willen / vnd im Lande
Chanaan wohnen / dahin er geschickt vnd geleitet wurde?

Ziehet im Namen Gottes fort von den heillosen Leu-
ten / die ewer nicht werth sind / weil sie euch ja also treiben /
vnd nicht haben wollen / vnd laffet das ehrliche Volck / 1. Die
Verfolger Christi vnd seiner Göttlichen Wahrheit / 2. den
Abergleubischen Lasterhauffen der Sacolischen / 3. vnd die
verzweiffelten Mammelucken vnd verleugneten Christen / die
sie ihnen selbst in grosser anzahl gemacht haben / bey ein ander
bleiben / weil sie ja alleine bey sammen seyn wollen / wer weis
was sie drücket / vnd was Gott vber sie beschlossen hat.

Vnd laffet euch das geplurre von dem vngehorsam /
welches sie euch nachplöcken / wie die vollen vnd tolln Kels-
ber / oder nachbellen / wie die giftigen bösen Hunde / oder
nachbrüllen vnd brummen / wie die zornigen grümmigen Lew-
en vnd Beeren / nichts vberal anfechten noch jure machen.
Es ist ein heiliger Vngehorsam / (das gleubet ihr mir) den
ihr begehret / vnd tausendmal besser als ein ander gehorsam /
der auch in einer guten sache der Obrigkeit sonsten geleistet
werden kan.

Daß mā
vmb des
Vnd bedencket zum Ersten / das es Gott mit euch jetzt als
so schicke vnd haben wolle. Den daß ihr also mit Gewalt ges
drung

drungen werdet auf zu ziehen / das ist nichts anders als Gottes Stimme / der euch ruffet / vnd ist eben / als spreche er vom Himmel herab zu euch / wie zu Abraham: **Geh aus deinem Vaterlande / vnd von deiner Freundschaft / in ein Land / das ich dir zeigen will.** Oder / als spreche Christus zu euch / wie zu Mattheo / da er am Bosas: **Folget mir nach.** Oder zu Andrea vnd Petro: **Folget mir nach / ich wil euch zu Menschenfischern machen.** Oder zu Jacobo vnd Johanni / im Schiff bey ihrem Vater Zebed. o / **daß sie zu ihm kommen sollten / zc.**

Evangelij
wollen
gern weis-
chen vnd
alles ver-
lassen sol-
l. Vrsach.

Lasset ihm befohlen seyn / warumb er euch jetzt also ruffet / vnd aus ewrem Heymath / von ewren Gütern / Neze vnd Schiff. in abfordere.

Thut ers nach seinem blossen Willen / daß es ihm also wol gefellet / vnd daß er Lust hat nur also mit euch zu spielen / vnd seine Kürzweil zu haben / so seyd ihr schuldig ihm zu gehorsamen.

Thut ers euch zu oben vnd weiter zu bringen im Glauben / anrufung / Hoffnung / gedult / zc. so seyd ihr schuldig zu folgen.

Thut ers / ewer etwa anderswo / zu seinen Diensten zu brauchen (ale sich vielleicht mit der zeit möchte aufweisen) so seyd ihr abermals schuldig zu folgen.

In Summa / ihr seyd seinen Willen zu erkennen / denselbigen euch gefallen zu lassen / vnd ihm zugehorsamen schuldig / ihr sehet gleich an auff welcher seiten ihr wöllet.

Zum andern / bedencket / daß Gottes Gerichte wunderbarlich sind / vnd möchte vielleicht eine Straffe vber die Cacolischen des ortes / ihrer lang getriebenen Abgötterey vnd Gotteslesterung halben vor seyn / daraus euch Gott durch dieses Mittel gedoncket zu ziehen vnd zu erretten / wie er den Loth mit seinem Gesinde / als die Stadt vntergehen / vnd mit

Die 2.
Vrsach.

Ⓔ

Few

Fewer vom Himmel verderbt werden solte / aus Sodoms
führen ließe. Und wie er die Jüden triebe / vor ihrer zerstö-
rung vnd verwüstung des Landes / die Christen aus Jerusa-
lem vnd Jüdischem Lande zu versagen. Es geschieht nicht
ohne Ursach / das glaubet sicherlich / daß das Volck jeso mit
solchem Ernst darnach strebet / daß es möge alleine seyn / vnd
keinen frommen rechtschaffenen Christen mehr vnter sich lei-
den wil / es möchte sich außweisen ehe man sichs vermutet /
warumb es geschehen.

3.

Zum dritten / bedencket doch auch / daß ihr gegen die ar-
me Partecken vnd elende Bauchspeise / so ihr begeben vnd
faren lassen müßet / kommet zum rechten waren Himmelbrod
vnd Speise der Seelen / dem heiligen Göttlichen Wort /
vnd Brauch der Hochwürdigen Sacramenten.

Lieber achtets doch nicht für so ein gering ding / wenn
ihr an örter kompt / vnd seyn möget (als euch leicht kan wie-
derfaren) daß ihr Gottes Wort lauter vnd rein alle Tage mit
andern rechten Christen hören / vnd des HErrn Abendmals
nach seiner einsetzung gebrauchen könnt / dazu Gott mit ihe-
nen anruffen / loben / dancken / ewere Kinder dabey auffzie-
hen vnd vnterweisen lassen / zc. Ihr werdet es allererst sehen
vnd erfahren / was es für ein Schatz sey / wenn ihrs vberkoma-
met / vnd euch nimmermehr wieder zu rück sehn / ihr wol-
tet denn thun wie die Kinder Israel / die ihnen das Maul wie-
derumb wessern ließen / nach dem stinckenden Knoblach /
Zwibeln vnd Fleischöpfen Egypti / des ich mich nicht zu
euch verseehe / vnd bitte Gott / er wölle euch mit gnaden dafür
behüten.

4.

Zum vierden bedencket / daß ihr auff die weise vnd durch
das mittel in die heilige selige Märtyrers Zunfft kommet / vnd
werdet dazu in dieselbige eingenommen / so ganz liederlich /
als vnter tausenden wol kaum einem wiedersehret. Was an-
dere

dere

dere haben mit schwerer Marter / Pein / Not vnd Tode erka-
nen vnd kuffen müssen / das gibt euch Gott so wolfeil / vnd
lessets an euch kommen vmb ein treten vber den Forweg / oder
etwa vmb ein bar Guldten (also zu heissen) die ihr vielleicht zu
warzeichen müsst einlegen / das ihr solcher Guldten gliedmas-
sen seyn solt.

Zum Fünfften bedencket / wie das jenige / das ihr auff
ewren rechten Glauben vnd Bekenntnis disfalls wendet / oder
das ihr darumb lassen vnd verlieren müsst / so ganz herrlich /
köstlich vnd wol angelegt sey.

Ihr opffert es je warhafftig Gott selbst / vnd verehret
damit ewren Heyland / Erlöser vnd Seligmacher Jesum
Christum: Das ist der süsse Geruch / von dem die Schrifft
saget / das er Gott so trefflich angenehm sey / das er ihn gleich
erquicket / 22.

Warumb woltet ihr denn hie fast karg seyn / vnd et-
was sparen? Solte euch doch nicht rewen Leib vnd Leben
diesem HErrn zum Dpffer zu lieffern / geschweige denn Geld
oder Gut / Gold oder Silber / oder was es sonst auff Erden
seyn möchte.

Zum sechsten bedencket / das ihr die lieben Engel Gots
tes / vnd alle Heiligen im Himmel vnd auff Erden erfreuet /
wenn ihr vmb d s Namens Christi vnd seines heiligen Worts
willen so getrost / frölich vnd willig fahren lasset / alles was
euch ohne das so herrlich lieb vnd angenehm ist / darzu von
andern Leuten / den Bekindern / so feste gehalten wird / das
sie ehe Gott vnd sein Reich faren lassen / als sich desselbigen er-
wegen / Das euch ja auch selbst eine Freude seyn sol / vnd
nicht tawren / ob ihr gleich etwas darauff wenden oder dar-
rumb geben müsstet.

Zum siebenden bedencket / das ihr mit ewrem Exempel
so manchen schwachen vnd blöden Christen stercken werdet /
E ij das

5.

2.

6.

7.

daß er zu den ehren Gottes vnd seinem selbs heil auch also desto getroster vnd frölicher euch nachfolge vnd hinan gehe / wenns an ihn köm zu bekennen / vnd von der heiligen göttlichen Wahrheit wegen das seine auffzusetzen / nicht allein je so bey euch in Francken / sondern auch zu künfftigen zeiten / an andern orten mehr / dahin das Gerüchte von euch kommen vnd erschallen wird. Das wird grossen Lohn geben / viele zur Gerechtigkeit weisen / stercken vnd erhalten / die sonst vielleicht zaghaftig würden / abfielen / dahinden bleiben / vnd jemerlich verdürben.

8. Zum achten bedencket / wie ihr damit ewer gut frölich gewissen erhaltet / vnd der fahr abkommet / darinnen ihr sonst schwebet / wenn ihr so feste an ewern Gütern hanget / vnd euch so ungerne davon scheidet. Denn je neher ihr darbey seyd / vnd je lenger ihr ihnen nahe bleibet / vnd je mehr ihr sie in augen / sinne vnd Herzen behaltet / je mehr schmerzens ihr darob empfaht / je kleinmütiger ihr drüber werdet / vnd je grössere Gefahr / zweiffels / ungedult vnd abfallens halben vber euch schwebet. Welchem allem ihr entfliehet / wenn ihrs Gott walten lasset / vnd euch es erweget.

Was hilfft es doch / daß ihr euch lang dabey vmbdrehet vnd vmbseheth / weil ihr wisset / höret vnd sehet / was es für eine gelegenheit habe / daß man euch nemlich zu Heuchlern oder gar zu Nammelucken zu machen gedencet / wenn ihr anders bleiben wöllet / besser wirds keinem / das ist je für Augen vnd aller Welt offenbar.

9. Zum Neunden / bedencket doch / was für einen schlechten geringen Vorteil / gegen der aller höchsten beschwerung ihr erhalten würdet / wenn man euch schon wieder anneme vnd einkommen liesse / vnd da es aller dinge wiederumb würed / wie es vorhin gewesen ist.

Der Leibes Narung halben möchtet ihr ja vielleicht ein wenig
nig

nig best sitzen / denn an einem andern ort / da ihr nu hinzie-
hen oder kommen könntet (wiewol ihr dennoch auch nicht wis-
sen möget / was euch Gott der Herr daselbs noch geben oder
bescheren möchte) Aber dagegen müstet ihr die aller beschwer-
lichste dienstbarkeit auff euch tragen / ewer Religions vbung
vnd Glaubens halten / das ihr wol mehr vrsach hettet / euch
zu bemühen / wie ihr mit ehren vnd fuge möchtet abkommen /
wenn ihr gleich macht hettet zu bleiben / denn wie ihr wieder-
rumb euch bey ihnen möchtet einteidigen.

1. Denn erstlich dürfftet ihr öffentlich weder frölich noch Dienst-
sicher dem lieben Evangelio / dem reinen Wort Gottes vnd barkeit
rechtem Gebrauch des Abendmals des Herrn nachgehen / dere die
sondern wenn ihrs thutet / so müstet ihrs verstoßen vnd heimlich vn-
lich thun / da ihr anders nicht woltet darumb büßen oder straff^{term}
leiden / Denn also hat man es vorhin mit euch gehalten / das^{Pabstum}
wisset ihr. auffhalte.

2. Vnd wenn mans euch gleich nachgebe vnd zusehe / könd-
tet ihrs doch nicht allezeit haben / wenn ihrs bedürfftet vnd
gerne hettet / Denn ihr habts je vnd allwege müssen in andern
Herrschaften suchen vnd holen / das ist euch ja auch vnver-
borgen.

3. So köndet ihr euch schwerlich aller Gemeinschaft in
geistlichen sachen mit den Papisten in ihrer Sacolischen Res-
ligions vbung genzlich erwehren / wenn ihr also mitten vn-
ter ihnen bleiben müstet / darbey offemals ewere Gewissen eis-
nen Stoß vnd anfechtung kriegen würden / wie ewer viele
ohne zweiffel selbs vorhin auch erfahren haben / vnd derhalben
bekennen müssen / wenn sie anders gleich wollen zusagen.

4. So müstet ihr je leiden / daß man euch ehrliche Begre-
nisse der ewigen mit Christlichen Ceremonien / Beichte / Ges-
sunge /

sange Predigen / 22. wehrete vnd auffhielte / wie aller Welt
kund / daß man bishero mit euch ist umbgegangen.

5. Müstet ihr euch auch vnter ihnen fast ehrlos halten vnd
schelten lassen / vnd dennoch darzu stille schweigen / vnd nicht
verantworten / in dem man euch / da ihr vorhin in Ehren stens
den gewesen / derselben entsetet / vnd förder vnverholen ge-
schaffet / daß ewer keiner mehr darzu erhaben oder zugelassen
werden sol. Vnd dergleichen andere stücklein noch viel
mehr / die einem verstendigen / frommen / Gottfürchtigen /
erbarn Menschen / sehr beschwerlich fürfallen / vnd eine große
Last zu tragen weren.

Was zeihet ihr euch denn nu / daß ihr nur allein vmb bes-
elenden Mails oder Bauchs willen / an denen orten so feste
anklebet / da man euch in geistlichen sachen / die Seelen bes-
treffende / in Warheit viel leger vnd vbler helt / als die Jüden
im Gefengnis zu Babylon sind gehalten worden / so lang sie
drinnen gewesen / wie das wol sein außzustreichen vnd weiter
darzuthun were / wenn man die Zeit darzu hette / vnd so viel
Mühe drauff wenden wolte / daß man eine völlige verglei-
chung davon möchte anstellen.

10. Zum zehenden / lieber so schet doch auch ewre Nachbarn
an / welche sich haben bewegen lassen / von ihrem Glauben
abzufallen / vnd das leidige / lesterliche verdampfte Bapstumb
wiederumb anzunemen / damit sie bleiben möchten / Vnd sa-
get mir / ob ihr euch auch des lebens wündschen woltet / wenn
ihr jetzt an ihrer stat seyn soltet.

Ich wil zu nachtheil ihrer weltlichen ehren hiermit gar
nichts weder gesaget noch geschriben haben / ist auch meine
Meynung nicht / das weis Gott / vnd bezeuge es hiermit so-
lennter für aller Welt / wie das zu recht geschehen sol / kan
oder

oder mag / daß es gnug sey / vnd dennoch zu ewrer sterckung
ein stücklein oder etlichß setzen / dabey ihr abnemen vnd auß-
rechnen könnet / wie gar viel besser ewre sachen als ihre stehen /
Wenn ihr gleich nacket vnd blos davon gehen müßt / vnd biß
an der Welt ende relegirt vnd verweist weret / Sie aber säßen
im Lande auff König Salomonis Stuel / vnd im Golde tiß
vber die Ohren.

Fürs erste / sehet vnd wisset ihr / daß sie ein böß Gewis-
sen haben / welches sie ohn vnterlas beisset vnd naget / daß sie
selten eine gute vnd recht fröliche Stunde dafür haben könn-
nen / oder da sie es gleich seho verachten / vnd aus dem sinne
schlagen / so ist ihr Vnglück vnd Schade nichts desto gerin-
ger / sondern viel grösser vnd erger.

Was vers
leugnung
mit sich
bringe.

Fürs andere / müssen sie wider ihr Gewissen noch teg-
lich vnd immerdar mehr sündigen / wenn sie die Cacolische
Religions vbung mit halten / bey der Messe vnd Proceßion
seyn / vnd des H. Erri Abendmal in einerley Gestalt (wie sie
es nennen) wider seine einsetzung empfangen müssen.

Fürs dritte / müssen sie des Gebets müßig stehen / oder
doch wissen / daß solches für Gott in keinem wege angenehm
sey / noch erhöret werde. Dürffen auch sonst nicht gedencen
noch sich getrösten / daß ihm Gotte solte etwas von ihnen wol-
gefallen lassen / wenn sie schon viel in solchem Namen fürne-
men oder thun wolten.

Fürs vierde / haben sie auff ihren Hals genommen alle
Abgötterey / Zauberey / Lesterey / Lügen / Mord / Raub /
Vizucht / vnd alle das Teuffels wesen / dessen das Wap-
stumb schuldig ist / zu dem sie wiederumb gefallen vnd getre-
ten sind.

Fürs fünffte / sind sie ja bey allen Gottfürchtigen / from-
men / redlichen / verstendigen Leuten in eine solche verach-
tung

ung kommen/das man ihnen nimmer mehr so viel zugestawa
et / als vorhin wol geschehen ist / weil sie ihren Glauben so
schendlich verleugnet haben / welchen sie doch noch heutiges
tages gerecht vnd heilig wissen / vnd bekennen müssen / wenn
sie anders ihres Herzens grund eröffnen / vnd die Wahrheit
sagen wollen.

Fürs sechste / vberzeuget sie ihr Gewissen / vnd das kla
re Wort Gottes sagt es ihnen frey rund vnd ausdrücklich vns
ter Augen / das sie mit ihrem verleugnen vnd abfalle des Be
kenntniß Christi in seiner herrlichen Zukunfft vnd das Erb
ewigen Lebens begeben vnd weggeworffen haben / Dagegen an
ber verdienet vnd geursachet / das er sie widerumb für seinen
heiligen Engeln vnd Himlischen Vater verleugnen / vnd in
das ewige Hellische Feuer werffen muß.

Fürs Siebende / haben sie nichts gewissers / denn das
sie auch noch hie zeitlich werden müssen g. strafft werden / vnd
ist ihnen alle Tage zu besorgen / wenn die Sünde recht auff
wacht / das sie nicht etwa / wie andern vielen ihres gleichen
Nammelucken allbereit geschehen ist / verzweifeln. Gott
wölle sich der elenden Leute erbarmen / vnd sie ja durch eine
warhafftige herrliche Bussse erhalten / vnd wiederum zu
recht bringen / Amen.

Wolan / weil ihr denn euch ohne zweiffel für einem sol
chen wesen von Herzen segnet: Wie drockset ihr denn noch
also / das ihr euch des orts nicht könnet erwegen / da es euch
doch nicht viel besser werden kan / wenn ihr euch gleich lange
drumb dringet / das ihr wieder vnter sie kommen möchtet?

II.

Zum eilfften / bedencket auch / das euch ewer abgang
vnd verlust auch allhier in diesem zeitlichen Leben widerumb
sol reichlich erstattet werden vnd herein kommen / wie euch
denn vnser HErr Jesus Christus / der Mund der Wahrheit
selbs verheisset vnd zugesaget hat / als er spricht / Marc. 10.
Es

Es ist niemand / so er verlesset Haus / oder Brüder /
oder Vater / oder Mutter / oder Weib / oder Kinder /
oder Acker / vmb meinet willen / der es nicht hundert-
feltig empfahe / jetzt in dieser zeit / Denker / vnd Brü-
der / vnd Schwester / vnd Mütter / vnd Kinder / vnd
Acker / mit Verfolgung / 22.

Zum zwölfften / bedencket zu lezt vnd endlich / was ihr
von ewiger Ehre vnd belohnung zu gewarten habe / für das
zeitliche / das euch allhie noch möchte nachbleiben / oder euch
darüber vnd darzu gegeben werden sol. Davon euch aber-
mal Christus selbs verwehnung thut / vnd saget: Wer mich
bekennet für den Menschen / den wil ich auch bekenn-
en für meinem Himlischen Vater. Matthei am 10.
vnd 19. Warlich ich sage euch / daß ihr / die ihr mit
meyd nachgefolget in der Widergeburt / da des Men-
schen Sohn wird sitzen auff dem Stuel seiner Herr-
lichkeit / werdet ihr auch sitzen auff zwölff Stülen /
vnd richten die zwölff Geschlechter Israel. Vnd wer
verlesset Denker oder Brüder / 22. vmb meines Na-
mens willens / der wirds hundertfeltig nemen / vnd
das ewige Leben ererben / 22.

Sehet / sehet / das alles hanget ja an ewrem weichen
oder fortrücken / das wisset ihr / vnd müßets bekennen / wenn
ihr ewer Heymath / daraus ihr vnschuldiglich wider alles
recht vnd billigkeit gedrungen werdet / begeben / vnd ewrem
Bischoffe sein Land lasset / wie ers haben wil. Was wolt ihr
euch denn hoch beschweren / vnd lang umbsehen? Weil
es je nicht anders sein wil noch kan / so fasset ewre Seele
mit Gedult / vnd gebt euch im Namen Gottes gütlich
drein / vnd ziehet hin / Dancket Gott / der euch wür-
dig achtet / vmb seines Worts vnd Namens willen Plage
zu leiden / vnd machets doch also gnedig: Wie müßet
ihr

ihr thun / wenns euch Hals vnd Bauch darzu kostet / vnd daß
ihr das Leben lassen müßet? Es ist noch ein treglich Creutz
dieses / vnd ein Schade der zu überwinden ist / wenn ihr schon
das Land / oder viel mehr nur allein dieses Herrn gebiete meis-
den müßet / Vnd habt darzu noch bevor / vnsern lieben Gots
tes Hülffe / der ehe drein sehen / vnd ewre beschwerung wenz-
den / vnd solcher vngerechten Verfolgung ein maß geben kan /
als jemand meinet. Darnach auch die Rettung der ordent-
lichen Gewalt / die da macht hat / vnd ist zu thun schuldig /
euch bey gleich vnd recht zu erhalten / zu schützen vnd hand zu
haben / wer weis / wenn sie vielleicht ihre Augen durch Gots
tes schieckung ein mal auff thun / vnd die Hand den vnbillich bes-
schwerden langen oder reichen möchte.

Beschluß

Sehet / solches alles habe ich euch zu diesem mal also
zum Trost vnd einer Christlichen Vermanung / als ein Nach-
bar vnd ewers glaubens mitgenosse / zuschreiben wollen / vnd
thue euch damit zum glückseligen neuen Jahr verehren. Gots
wolle seine krafft vnd safft darzu geben / daß es viel Frucht
bey euch schaffe / Amen. Ich sehe doch / daß jederman sons-
ten stille ist / vnd niemand der Rachen wil die Schelle anbinden /
Ein jeder sihet ewrem elende alleine zu / vnd lest euch drinnen
schwizen vnd recht außbadend / so lange es wäre / wie es in der
Welt pflegt zu zugehen. Ich bitte aber ganz dienstlich /
freundlich vnd Brüderlich / (wie oben) Ihr wollets von mir
im besten / wie es denn nicht anders gemeinet ist / verstehen /
vnd euch gefallen lassen. Mit der zeit / wils Gott vffs schiers-
te / sol ein ausführlich Schreiben / von dem Bekentnis / abfall
vnd verfolgung des Evangelij / so diese drey Jahr hero im
Land gewaltet / hernach folgen / darinnen alle sachen zur
nothdurfft ziemlich sollen erkleret werden / seht nemet für gut.
Ich beschliesse nun mit wiederholung des heilige schönen Ges-
gung

gens der Maccabeer / droben von worten zu worten angezo-
gen / zum neuen Jahr.

1. Gott segne euch :

2. Vnd gedencke an seinen Bund / den er Abra-
ham / Isaac vnd Jacob / seinen trewen Knechten /
zugesaget hat.

3. Vnd gebe euch ein rechtschaffen Wertz / dasz
ihr in seinem Gesetze feste vnd bestendig bleibet / (D
ja / das ihue der liebe Gott / zu seinen ehren / vnd zu ewrem
ewigen heil vnd Seligkeit.)

4. Vnd verleibe euch / dasz ihr fleissig seib in sei-
nen Geboten / (denn das muosz auch seyn / wenn man anders
seine Hulde vnd Gunst behalten wil.)

5. Vnd tröste euch / (dasz ihr ein gut Herr haben möget.)

6. Vnd sey euch gnedig (dasz ist / halte euch ewre schwach-
heit vnd gebrechlichkeit zu gute / vnd lasse euch derselbigen vnd
gar keiner Sündē sonsten entgelten.)

7. Vnd lasse euch nicht in der noth (sondern stehe euch
bey / vnd errette euch mit gnaden.)

Also bitten wir stets für euch / vnd ist vnser Herr
schonliche begirde vnd tegliches seuffzen / das weis derselbige
vnser Gott / der es euch geben wolle nach seinem gnedigen wil-
len vnd wolgefallen / Amen. Datum Schmalkalden / am
Tage der Geburt Christi / vnser lieben HErrn / Heylandes
vnd Seligmachers / der sich omb vnser willen selber freywil-
lig ins elend dieses Jammerthals begeben hat / auff das er vns
zu vnserm rechten Heymath vnd warem Vaterlande / welches
wir verschalcket hatten / vnd billig draus verstoßen waren /
wiederumb bringen möchte. Dem sey nu Lob / Ehre / Preis
vnd Danck darumb gesaget / von ewigkeit zu
ewigkeit / Amen / Amen /

Amen.

D ij

Be

Bericht vom Abfall vnd verleugnung des heiligen Evangelij.

Erstlich /

Was daran für Sünde geschehen.

Zum andern /

Wie einer derselben doch auch widerumb le-
dig werden / vnd zu gnaden kommen könne.

Vom Ersten.

Es ist sich warlich hoch zu verwundern / vber
dem schrecklichen vnbesonnenen abfall / welcher sich
Jesu in Francken / einer solchen geringen verfolgung
halben / mit so vielen Christen zugetragen / die der heiligen
Göttlichen Wahrheit wol berichtet gewesen / auch derselbigem
darumb mit herrlicher Begierde / Freude vnd wolgefallen /
lange zeit angehangen sind.

Ach lieber Gott ja / wer hette sichs können versehen / daß
die Leute so sicherlich vnd leichtfertig in diese grosse Sünde
hätten hinein plumpen sollen / die von anfang der Welt hero
für die allerschrecklichste vnd grausamste / als sie denn war-
hafftig auch ist / geachtet worden? Aber es ist ein Zeichen daß
die zeit vorhanden sey / von welcher vnser lieber Herr Jesus
Christus gesaget hat: Meinstu / wenn des Menschen
Sohn kommen wird / daß er auch werde glauben
finden auff Erden / Luc. 18. Weil es aber dennoch noch
bey wenigen wil erkant werden / muß gleichwol jemand seyn
der

der dazurede / vnd sich ein wenig vernemen lasse / wie es vmb
solchen Handel gewant sey / ob es vielleicht noch etliche möch-
te helfen / daß sie es erkennen / vnd Busse wircketen. Vnd
solches habe ich mir nu jeko im Namen Gottes / als ein Pres-
diger / (der dem HErrn Christo dennoch nu auch eine ziem-
liche zeit / sonder ruhm / treulich gedienet hat) auffs kürzeste
zu thun fürgenommen. Sintemal ich sonsten niemands
sonderlichs vermercke / der sich gedechte drein zu legen / vnd
den heillosen Leuten ihre Sünde auffrücken / vnd dieselbigen
ein wenig für die Nasen stellen wolte / vnd muß doch warlich
warlich seyn / wenn der Christliche Enfer sich anders nicht
gar verlieren / vnd die Schuld der abtrünnigen vnd verleug-
neten Christen nicht zum theil mit zu auff vns auch walzen
vnd fallen sol.

Wolan / so walts Gott / ich wil einfeltig vnd furh mit
der Sache vmbgehen / vnd dennoch zu Gott hoffen / ich wöl-
le sie zur nothdurfft fein an den Tag legen.

Zweyerley Vbelthat ist in der jetzigen verfolgung ge-
schehen / von denen allensampt / die eine andere Religion an-
genommen haben.

Die erste / daß sie ihren waren Glauben / welchen sie
nach ihrem Gewissen vorhin erwehlet / vnd eine gute zeit ges-
halten / auch noch warhafftig vnd heilig bekennen müssen /
schendlich begeben vnd fallen haben lassen.

Die andere / daß sie dargegen den verlassenen / Bap-
stischen / erkandten vnd vberzeugten Aberglauben / von wels-
chem sie vorhin ihres Gewissens halben abgetreten waren /
nun widerumb erwehlet vnd angenommen haben.

Durch den Abfall vom vorigen rechten Glauben sind
diese schendliche schreckliche Mißhandlung geschehen / die
nimmermehr zu entschuldigen / sondern stracks in abgrund der
Hellen zu verfluchen sind.

1. Erstlich/haben sie sich von Christo ihrem Heylande selbs
warhafftig abgewendet / vnd denselben schlechts begeben/das
sie ihn nicht mehr für ihren Seligmacher erkennen wollen /
der doch vmb ihrent willen / auff das er sie erlösen vnd ihnen
helffen möchte/ seines lebens nicht verschonet/ sondern es wil-
liglich für sie hingegeben vnd gelassen hat. Vnd haben da-
mit öffentlich bezeuget / das sie ihn noch nie von Herzen lieb
gehabt / noch hold gewesen sind / wie er selbs saget / Joh. 14.
Wer mich liebet / der wird meine Wort halten / 28.
Wer mich aber nicht liebet / der helt auch meine
Wort nicht.

2. Zum andern/haben sie sein heiliges Evangelium schend-
lich begeben vnd faren lassen (denn das vnd sonst nichts hat
man auch von ihnen haben wollen) das thewre Wort / den
Edlen Schatz / der in allen vnsern ansechtungen vnd nöhten
in dieser Welt allein vnser warer Trost / vnd auch im Tode
das Leben seyn kan vnd seyn muß wie geschrieben stehet / Psal.
119. Wenn dein Wort nicht mein Trost gewesen we-
re / so were ich vergangen in meinem Elende. Vnd
Joh. 8. Warlich ich sage euch / So jemand mein
Wort wird halten / der wird den Tode nicht sehen
ewiglich. Darumb auch die lieben Aposteln allein so feste
bey dem HErrn Christo hielten / als andere zu rücke giengen /
vnd sich von ihm abscheideten / vnd der HErr sie fragte:
Wollet ihr auch weg gehen? Antworten sie durch Petrum:
HErr / wo sollen wir hingehen / du hast Wort des Lebens.

3. Zum dritten / haben sie sich geschieden vnd abgesondert
von der waren Kirchen Christi / dem Heüßlein der rechtglaubis-
gen / so Christum alleine angehoret / haben dasselbige verlas-
sen / vnd seine Gemeinschaft vbergebē / das sie nicht mehr mit
ihm wollen theil haben / Wie sie denn auch von stunden an / da
sie

sie von ihm gegangen sind / alles sampt verloren / vnd sich des
selben entschert haben.

4. Zum vierden / haben sie mit Christo / seinem Wort / dem
heiligen Evangelio / vnd seiner lieben Kirchen / auch be-
geben die Gnade Gottes in diesem Leben / vnd im künfftigen das
Erbe der ewigen Freude vnd Seligkeit im Himmel / derglei-
chen kein Auge gesehen / kein Ohr gehört / vnd in keines
Menschen Herr gestiegen ist / ꝛc.

Ist aber das / lieben Leute / nicht eine grausame schreck-
liche Gottes vnd sein ewigen Reichs verachtung? Sie ha-
ben wol gewußt / vnd hat ihnen nicht können verborgen seyn /
wenn sie abfielen / müßten sie Christum verleugnen / sein Wort
begeben / die rechte Kirchen verlassen / vnd seiner Gnade vnd
ewigen Reichs sich verzeihen: Noch haben sie es hinein ge-
setzt / dran gewaget / vnd sind sein dahin gegangen. Ach Gott
von Himmel / was ist ein Mensch / wenn er das alles ver-
leust. Ob er gleich ein Herr der ganzen Welt würde / als
le derselbigen Güter vnd Herrligkeit auch sein lebenslang viel
hundert oder tausent Jahr besitzen möchte?

Vnd das zumal ihre that schendlich vñ feindselig machet /
haben sie solches alles begangen / ohne sonderliche hochdrin-
gende noth / leichtfertiglich / fast gar ungeklemmet vnd unge-
drenget. Den was hat man ihnen doch gethan / damit man
ihnen solches alles abgedrungen? Hinweg hat man sie heissen
ziehen aus dem Flur / das ist alles gewesen / in dem sie viel-
leicht etwas ein wenig hetten müssen verreren oder verzets-
eln / vnd nicht alles biß auff den letzten scherff mitbringen
können.

Ehe sie das haben wollen erdulden / ehe haben sie Chris-
tum selbs verleugnet / sein Wort fahren lassen / sich von der
Christlichen Gemeine geschieden / vnd der Gnade Gottes vnd
ewig

ewiges Lebens verziehen / Aus / daß euch **G**ott plage (zur
Busse vnd Besserung meyne ich) ihr gottlosen vnd verzweif-
felten Leute.

Wenn man sie hette rädern / ädern / siedern / braten / zu
pulver verbrennen wollen / vnd das vielmals / wennes möglich
gewesen / hetten sie es dennoch nicht thun sollen.

Warlich also habens die lieben Märterer von anfang
gehalten / vnd haben daran nichts genarret / sondern ihren
sachen auff das aller weißlichste vnd beste fürgestanden. **S.**
Petrus vnd **A**ndreas liessen sich drüber creuzigen / **S.** **B**ar-
tholomeus schinden / **S.** **L** Laurentius auff Kolen braten / die
Mutter bey den **M**acabeern / mit ihren 7. Söhnen / 2. **M**ac.
7. auff das aller gewulichste martern vnd tödten / 2. **V**nd
diesen ist man noch nicht mit dem aller geringste an die Haut
kommen / habens dennoch schendlich alles fallen lassen / vnd
von sich geworffen / **G**ott vergebts ihnen gnediglich / wennes
ihnen leid wird.

Durch die annemung des **B**apstums aber
sind nachfolgende **M**ißhandlung
begangen.

Erstlich / sind sie dem **T**euffel zu Fuß gefallen / vnd ha-
ben ihn zum **H**errn angenommen vnd angebetet.

Zum andern / haben sie seine Lügen für rechte **W**arheit
zu hören / zu ehren / vnd zu brauchen verwilliget.

Zum dritten / sind sie flugs drauff auch hinüber zu sei-
nem **V**olck getreten / vnd haben zugesagt / in desselbigen ge-
meinschafft sich forthin zu halten / auch zu **W**arzeichen bald
die **P**rob gethan in etlichen stücken / als nemlich mit der **A**b-
göttischen **P**rocession / vnd dem brauch des **A**benndmals in ei-
nerley **G**estalt / 2. auff daß ja niemand dran möchte zweif-
seln.

Zum

Zum vierden / vnd damit sich endlich eingelassen / auch
dessen sampt ihnen zu gewarten / daß er (der Teuffel vnd sein
Bolek) in jenem Leben zu empfangen hat. Denn das muß
seyn / vnd gibt sich aus natürlicher folge selbs. Wenn man
mit sapper in der außbeute / wie jener Wirt mit den Dieben /
so muß man darnach auch mit sappen / wens henckens gilt am
Galgen / da wird nicht anders aus.

Wolan / müssen aber nu das nicht auch recht gottlose
verwegene Leute seyn / die ein solchs zu thun weder Furcht
noch Schew tragen? Wie kan man doch achten / daß ein
Füncklein rechter warer Gottesfurcht in ihren Herzen noch
vbrig blieben sey? Sonderlich wenn man darzu betrachtet:

Fürs Erste / daß sie solches alles fürsetzlich vnd wissent-
lich gethan haben. Denn sie können nicht sagen / daß sie den
Teuffel vnwissentlich aus einem Irrthumb / daß sie ihn nicht
erkant / vnd gemeynet haben solten / er were der rechte ware
Gott / angebetet. Er ist frey öffentlich für ihnen gestanden /
nicht verstellet in einen Engel des Liechts / sondern in seiner
natürlichen schwarzen scheußlichen Lasterlarven / daß ihn al-
le Welt hat kennen können / vnd wissen daß ers were / noch
haben sie ihn angebetet.

Sie haben seine Lügen nicht angenommen / der Mey-
nung / daß sie hielten es solte warheit sein / sondern sie wissen
noch auff den heutigen Tag sehr wol daß es Lügen seyn / vnd
Lügen bleiben immer vnd ewiglich / dennoch haben sie sie an-
genommen.

Sie haben zu seinem Bolek sich nicht darumb gesellet /
daß sie jemals gedacht oder geglaubet / ihre Sacolische Kirche
were die rechte warhafftige Kirche Christi / sondern habens
wol gewußt / vnd wissens noch heutiges tages / daß es gewiß-
lich des Satans Synagog sey / darumb sie sich auch nicht
mit willen noch gerne hinein begeben / blieben auch nicht einen
E
aus

Augenblick drinnen / wenn es ihnen noch frey stünd / vnd ohn
gefahr were / widerumb heraus zu springen.

Fürs andere / daß sie es nur allein vmb des elenden
Bauchs vnd zeitlichen Guts willen gethan haben / vnd noch
thun / ohne welches sie es nicht ansehen / noch sumermehr
dabey bestünden.

Fürs dritte / daß sie es nicht vmb die Reiche der Welt
vnd alle ihre Herrligkeit / wie sie dem Herrn Christo selbs
dargegen vom Satan angeboten worden / Matth. 4. son-
dern nur (so zu sagen) vmb ein stück Brods / vmb eine elen-
de Partekken / Summa / vmb ein gericht Linsen hat der
schendliche Esau seine erste Geburt / das ist / seine aller größ-
ste Herrligkeit für Gott vñ den Menschen hingegeben. Des
Eins theils habens gethan / daß sie nur allein das ihre behalten
möchtē / was sie zuvor gehabt: Eins theils / daß sie etwa ein we-
nig möchtē hinauff ans Bret gerückt / mit Herrn Gnade
vnd irgēd einem ziemlichen Geschencklein geworffen werdt.

Das / das ist / daß bey ihnen so hoch ist angesehen / vnd
gros geachtet gewesen / daß sie dafür den Satan zum Herrn /
seine Lügen für ihre Religion / vnd sein Volk für die Kirche
erkennet vnd angenommen / auch sich begeben haben in jenem
Leben mit ihnen theil zu nehmen. Psui der greßlichen Sünde
vnd Schande.

Nun dürffen sie aber noch wol sicher darzu seyn / vnd sich
bedüncken lassen / ihre Mißhandlung sey nicht halb so gros /
als sie von etlichen wol angesehen vnd aufgeschrieen
werden / tragen noch gar herrlich hohen Zaum / vnd wollen
schlecht nicht leiden / daß man sie verdenncken / vnd ihren Ab-
fall für vbel auffnehmen sol : Man sol sie stracks vnverdampft
lassen / vñ einen weg wie den andern mit ihnen zu frieden seyn /
sonderlich weil ihr Abfall nicht aus einem muetwillen / sondern
aus Zwang vnd drang (wie sie sagen) geschehen sey / noth hal-
ben /

ben/das sie nirgend aus gewußt/vnd ihre arme Weib vnd Kinder gleichwol auch bedenden müssen/darzu mit ihren Herzen noch einen Weg wie den andern an ihrem alten Glauben vnd vnserer Gemeinschaft (nicht aber an der Ecolischen) hangen/2c. Denn mit diesen Feggenbleetern pflegen sie fürnemlich ihre Schande zu decken/wie ich vielmals gehört vñ erfare habe.

Es ist aber lauters nichts / vnd ein vnbillicher verkertter Handel von ihnen/das sie es noch vntersehen fast zu rechtfertigen/oder doch zum wenigsten zu serben vnd schöne zu mache: Sol ihnen auch in keinem wege verstattet / sondern für vnd für als eine hohe vnd grosse Vbelthat vnter die Nasen gerieben werden/wo man nur fug vñ Gelegenheit darzu haben kan/bis sie es erkennen vnd wiederkeren / ohne das sollen sie von den vnsern gar nicht mehr für Christen oder für Brüder gehalten/sondern gerichtet werden/wie man sie findet/wie sie denn selbs durch einen öffentlichen Abfall vnd Absonderung sich von vnser geistlichen vñ leiblichen Gemeinschaft gethan vnd ausgeschlossen haben.

Es thut niches / das man fürwendet: Gezwungen End ist Gott leid: Ich habe es nicht gern gethan/ sondern ich habe es thun müssen/2c. Denn kein Mensch sol sich zwingen lassen/auch durch den grausamsten Todt nicht/das er Gott vnd sein Wort verlugne. Darumb tröstet die Schrift/wens zum zwang vnd drang kömpt / Esa. 51. Ich bin ewer Tröster/wer bistu denn/das du dich für Menschen fürchtest/vnd für Menschen Kindern / die als Dew verzehet werden/vnd vergiffest des HErrn der dich gemacht hat/der den Duffel ausbreitet/vnd die Erden gründet. Vnd der HErr Christus spricht/Matth. 19. Fürchtet euch nicht für denen die den Leib tödten können/vnd die Seele nicht mögen tödten: Fürchtet euch aber viel mehr für dem / der Leib vnd Seele verdammen mag in die Helle/2c.

E ij Dein

Dein erzwungen Eynd ist freylich Gott leid / nemlich /
beydes darumb / daß man ihn dir hat auffgelegt / vnd daß du
ihn gethan oder geleistet hast. Aber es machet dich darumb
nichts desto frömmere noch vnschuldig / sondern viel mehr zum
zwiefachen Schalcke: Nemlich einmal / daß du dich hast bes
wegen lassen zu schweren / auff eine Sache die vnrecht vnd
wider Gott gewesen ist: Das ander mal / daß du solchem
Eynd bist nachkommen / vnd dich nun im selben noch begreif
fen vnd finden ledest / 22.

So ist auch ein schlim fürwenden mit der noth / vnd
Wunder / daß vnter Christen sollen Leute gefunden werden /
die es für eine Entschuldigung dürffen anziehen / weil Gottes
ausdrückliches klares Wort stracks darwider ist. Denn es
sol heißen mit den Christen: Vergis deines Volcks / vnd
deines Vaters Haus / Psal. 45. Item: Wer Vater
oder Mutter / Weib oder Kinder mehr liebet denn
mich / der ist mein nicht werth: Item: Wer zu mir
kômpt / vnd hasset nicht seinen Vater / Mutter / Weib /
Kind / Brüder / Schwester / auch darzu sein ei
gen Leben / der kan nicht mein Jünger seyn / Luc. 14.

Wie es auch zu lest nichts gilt / sondern gleicher Gestalt
einen zwiefachen Schalck offenbaret / wenn man wil fürwen
de / man sey wol dort eusserlich mit dem Leibe / aber hier sey man
mit dem Geiste vnd Herzen noch eine zeit wie die andere.
Denn vnser HErr Christus wil keinen solchen Diener haben /
vnd spricht stracks darwider: Niemand kan zweien
Herrn dienen / Entweder er wird einen lieben vnd
den andern hassen / oder einem anhangen / vnd den
andern vrrachten / Matth. 6.

Glaube des Herzens / vnd Bekenniß des Mundes (dars
zu auch alle eusserliche geberde gehören) müssen beyammen
seyn / Rom. 10. Wenn man mit dem Hertzen glaub
bet /

bet/ so wird man gerecht: Vnd wenn man mit dem
Munde bekennet/ so wird man selig. Denn es heisset:
Ich glaube/ darumb rede ich/ Psal. 116. Vnd weiß
mans wil beynt Liechte besehen/ so ist das eusserliche Bes
kennniß (für Menschen davon zu reden) mehr/ als der ge
rühmte Glaube des Herzens. Denn des eusserlichen Bes
kennniß sind die Leute gewiß/ aber eines gerühmten Glau
bens können sie nicht gewis seyn/ weil er im Herzen/ dahin
sie nicht sehen können/ verborgen steckt vnd bleibet.

Vnd wenn aber gleich nu das Herz rechtschaffen were/
vnd eben also stünde/ wie es fürgegeben vnd gerühmet wird/
so würden doch solche Leute durch Gottes gerichte für falsch
vnd vntrew gestrafft/ auff beyden seiten/ vnd also befunden/
daß sie ihre eigene Schande allegirt vnd angezogen het
ten:

Bev den Eacolischen/ daß sie daselbsten sich eusserlich
stellten/ als weren sie mit ihnen einig/ vnd hetten doch war
hafftig weder sinne noch Herzen darzu/ welches nicht redlich.
Bev den vnsern/ daß ihr Herz mit vns were/ vnd doch die
eusserliche That/ Geberde vnd Wort dawider strebten/ wel
ches abermals nicht redlich.

In Summa/ es bleibet dieser vnd aller anderer Ent
schuldigung halben/ mit dem Abfall oder Verleugnung des
Evangelij/ vnd wieder annemung des Papstthumbs/ was vñ
wie es ist/ Mammeluckerey vnd Gotteslesterung/ Das ist
kurz vnd gut gesaget. Vnd sind alle Christen bey ihrer Ses
sigkeit schuldig/ sich beyde mit Straffe vnd Bermanung/
vnd Absonderung ernstlich dargegen zu stellen.

Erstlich von wegen des Christlichen Eyffers/ welchen
der Glaube fordert/ der auch bey allen/ so einen rechten Glau
ben haben/ gewißlich befunden wird. Denn es heisset: Ini
quos odio habui, legem autem tuam dilexi, Ich hasse
die

die Flabbergeister / vnd liebe dein Gesetz. Item: Ich
bin entbrand vber die Gottlosen / die dein Gesetz ver-
lassen / 22. Psal. 119.

Darnach von wegen Christlicher Liebe / welche wir auch
den ergsten Feinden schuldig sind / auff das sie wiederum zur
Busse gezogen / vnd erhalten werden mögen.

Endlich darzu / der grossen vnd gewissen fahr wegen / so
allen denen drauff siehet / die mit Worten / geberden oder
wercken sich stellen / oder einen solchen Schein geben / als
were es damit nicht so gar arg / wie es doch im Grunde besun-
den wird / dardurch denn die sichern vnd vnbusfertigen ge-
sterckt werden / dessen sie damit schuldig / vnd aller Sünden
theilhaftig werden / welche sie begangen haben / vnd hierbey
bleibe es nun: Anathema / der anders helt / oder sich darge-
gen anders erzeiget / Amen.

Vom Andern.

Vericht vnd Rath / wider die verzweiffelung
vber den Abfall oder Verleug-
nung.

Wiewol die Abtrünnigen / so Christum vnd
sein heiliges Wort verleugnet / vnd widerumb zum
schendlichen verdampften Papsthum getreten sind /
sich nicht allein an Gott versündigt / wie gehört / sondern
auch sehr vbel in mancherley wegen sich an vns vergriffen
vnd gemißhandelt haben. Denn sie haben vns je vnsern lie-
ben Heyland vnd Seligmacher geschmehet vnd verworffen.
Zum andern / haben sie vns vnsern Glauben geschendet.
Zum dritten / haben sie vns vnserre rechte vnd ware Kirchen
geunehret vnd verdampft. Zum vierden / haben sie vns vnd
alle vnserre Gliedmassen mit ihrem Abfall höchlich geergert /
vnd

vnd herzlich betrübet. Zum fünfften/ vnnnd haben dazu den
andern vnsern vnd ihren Glaubensgenossen / die vnter vnnnd
bey ihnen gewesen / ihre Verfolgung gemehret / vnnnd sind
Ursache gewesen / daß sie fortgesetzt vnnnd desto geschwinder
worden/zt. Verhalben sie nun auch wol verdienet hetten/vnd
werth weren / daß wir ihrer widerumb vergessen / vnd sie also
hinfaren ließen/biß sie dermaleins innen vnd gewar würden/
was sie gemacht hetten. Jedoch zwinget vnnnd dringet vns
die Christliche Liebe / daß wir müssen an sie gedencken / vnnnd
sorgfältig für sie seyn/ob Gott vielleicht noch ihrer etliche von
des Teuffels Stricken / damit sie erschrecklicher weise vnnnd
semmerlich verknüpfte sind / entledigen wolte.

Sonderlich aber sind vor andern die jenigen vnserer sorg-
fältigkeit / mitleidens vnd handreichung würdig / denen ihre
Mißhandlung vnd Fall nun zu gemüth gehet / vnd sind also
betrübt drüber / daß sie nicht wissen wo sie aus / vnd für eng-
sten bleiben sollen / weren gerne wieder zu rücke / wenn sie nur
wissen wie sie ihm thun solten / daß sie bey Gott vnnnd seiner
Kirchen widerumb zu gnaden kommen / vnd angenommen
werden möchten.

Verhalben/ auff daß denselbigem auch von vns gehalten
vnd gedienet werde / wil ich allhier fürzlich/ mit verleihung
Göttlicher Gnaden / den Grund setzen / vnd Bericht thun/
darauff die jenigen/so diß Falls halben in engsten sind/sich zu
stewern haben / daß sie des schweren Steins von ihren Hers-
ken los werden / vnd die Gnade Gottes vnnnd Hoffnung der
ewigen Seligkeit / so sie durch ihren Abfall vnnnd Verleug-
nung verloren / widerumb erlangen mögen. Gott helffe /
daß es vielen zu nutz komme / daß sie davon gebessert vnnnd er-
halten werden mögen / Amen.

Vnd erstlich ist es ja war / vnd nicht weniger / daß von Chris-
to abfallen / vnd seinen Namen vnnnd Wort verleug-
nen /

nen. / sey eine gretliche / erschreckliche / vnd fast die grössste
Sünde / die ein Mensch auff Erden thun kan. Denn sie
leuffe / strebet / vnd streitet stracks wider die erste Tafel der
heiligen zehen Gebot Gottes / vnd sonderlich wider das erste
vnd andere Gebot / derhalben sie auch gewis verdamlich ist.
Den es stehet hie das außgedruckte klare Wort Christi: Wer
mich bekennet für den Menschen / zc. Wer mich ab-
ber für den Menschen verleugnet / den wil ich ver-
leugnen für meinem Himlischen Vater. Wie das dro-
ben im Sendbrieffe auch für bestendig vnd gewis gesetzt ist.

Aber es ist nun weiter allhie wol in acht zu haben vnd zu
mercken / daß solch Breil in keinem wege ohn allen Außzug
weder zu sehen noch anzunehmen sey / sondern es habe seine
gewisse restriction, Ziel vnd masse. Nemlich:

Wenn die Sünde entweder nicht erkant wird / oder jes-
mand / der sie erkennet / darinnen verzaget / so ist sie freylich
allzu gewis vnd warhafftig verdamlich.

Aber wenn Busse des armen Sünders drein fället / daß
sie ein Mensch herzlich berewet / wiederkehret / vnd von sei-
nem Fall auffstehet: So hats gleichwol damit viel eine an-
dere Meinung / vnd ist ihm Gnade vnd Vergebung gar in
keinem wege abzusagen.

Die Elenden Gewissen sorgens wol / vnd haben viel-
mals schwere ansechtungen drüber / die Sünde sey gar zu
groß / vnd das Wort zu klar: Wer mich verleugnet für
den Menschen / zc. daß demnach keiner Vergebung weder
zu wartē noch zu hoffen sey / sie werde gleich erkant oder nicht
erkant. Wie man auch wol Schwermer für lengsten in der
Kirchen Gottes gehabt hat / die es also fürgegeben / vnd ganz
steiff drauff gestanden sind: Haben auch schlechter dinge der
keinen wieder wollen annemen / die aus Furcht der Straffe /
Pein oder Todes / verleugnet gehabt / vnd abgefallen gewe-
sen /

sen/ Ob sie sich gleich bekereet/ herzlich Gnade begeret/ vil ihre
rew in viel wegen bezeuget haben. Wie sonderlich Novatus,
ein Römischer Priester/ mit seinem anhang also gelehret vnd
gehalten hat.

Aber man sol wissen/ das es ein grosser Irrehumb vnd
schendliche Lügen sey/ die gang in keinem wege in der Kirchen
Gottes zu dulden.

Cains Lestergeist ist/ der erstmals den Spruch auff die
Ban gebracht vnd eingefüret hat: Meine Sünde ist
grösser/ denn sie mir mag vergeben werden. Aber S.
Augustinus widerspricht vnd Lügenstraffe ihn auch redlich
drüber: Mentiris Cain, major est Dei misericordia, quàm
omnium hominum miseria: Du leugst/ du Bös-
wicht Cain/ Gottes Barmhertzigkeit ist grösser
denn aller Menschen Elend.

Derhalben ist nun wider solchen Irrehumb/ vnd An-
sehung zu wissen/ auch steiff vnd feste drauff zu stehen/ vnd
drot zu halten:

Erstlich.

Das weder diese noch keine andere Sünde/ sie sey gleich
wie gros vnd manchfeltig sie wolle/ wenn sie erlandt wird/
vnergeblich sey. Denn auch die Sünde wider den heiligen
Geist/ wenn sie möchte erlandt werden/ nicht vnergeblich
were: Welche doch beyde Christus vnd S. Johannes vns
vergeblich machen/ vnd klar sagen/ sie alleine werde weder hie
in diesem noch in jenem künfftigen Leben vergeben.

Zum Andern.

Das keinem betrüben Sünder durchaus/ er habe gleich
gethan was er wolle/ die Gnadenthür verschlossen sey/ son-
dern allen/ allen zumal sieher sie offen/ so offte sie sich bekeh-
ren/ vnd haben auch allesampf Befehl/ recht vnd macht/ zum
Herr

Heylande Jesu Christo ihre zuflucht zu nennen / vnd der gewissen Gnade vnd Barmhertzigkeit / vergebung vnd erquickung sich zu versehen vnd zu getrösten.

Beweisung.

Denn da stehet ein Wort / das ist so gut als tausent: Kompt her zu mir / Alle / Alle / Alle / die Ihr mühselig vnd beladen seid / ich wil euch erquicken / Matth. 11. Welcher Teuffel wil / darff oder kan vns hie einigen auszug machen / da der Sohn Gottes selber so klar redet / vnd keinen auszug weder sehet noch machet / noch haben noch leiden wil: Trost sey allen Teuffeln vnd Pforten der Hellen / daß sie vns aus diesem gemeinem Spruch eine Particular rede machen / vnd solchen Grund umbstossen.

Weiter / noch mehr: Wer zu mir kömpt (spricht eben derselbige / vnser vnd aller armen Sünder Heyland / Erlöser vnd Seligmacher) den werde ich nicht hinaus stossen. Ich werde ihn nicht hinaus stossen / spricht er / wenn er nur kömpt / Er komme wenn er wolle / vnd sey wer er wolle / Joh. 6.

Item / Joels 2. Alle / alle alle / die den Namen des HERRN anrufen / sollen Selig werden.

Psal. 25. Keiner / Keiner / Keiner wird zu schanden / der dein HERR harret.

Esaie 1. Wenn ewre Sünde gleich Blutrot weren / so sollen sie doch Schneeweis werden: Vnd wenn sie gleich weren wie Rosin farbe. sollen sie doch weiß werden wie Wolle.

Jerem. 3. Kere wieder / du abtrünnige Israet / spricht der HERR / so wil ich mein Andlitz nicht gegen euch verstellen / spricht der HERR: Denn ich bin barmhertzig / spricht der HERR / vnd wil nicht ewiglich zürnen / allein erkenne deine Sünde / daß du wider
der

der den **HERRN** deinen Gott gesündigt hast / vnd bist hin vnd wieder gelauffen zu den frembden Göttern / 22.

1. Johan. 2. Er ist die Versöhnung für unsere Sünde / vnd nicht allein für unsere / sondern auch für der ganzen Welt Sünde.

Vñ vber das alles siehet zu lest sonderlich hie / zu aller größten beweisung solches gnedigen willens Gottes / der treffliche hohe Eydswur des **HERRN** / Ezech. 33. So war als ich lebe / spricht der **HERR** / wil ich nicht den Todt des Sünders / sondern daß er bekeret werde / vnd lebe / 22.

Wolan / so viel sey dißmals zum Bericht gnug / von der Sünde der Verleugnung vnd des Abfalls / wie sich im Grunde vnd warhafftig drum halte / vnd sey dieses die Summa :

Die grössste Sünde ist zwar auff Erden / vnd verdammet freylich ohn allen zwiffel / alle die sie auff sich haben / wenn sie die entweder nicht erkennen / oder aber darinnen ver zweiffeln.

Darnach:

Wenn sie aber gleichwol erkand vnd berewet werde / so endere sich das strenge Vrteil / vnd finde solche Sünde / nicht weniger als alle andere Sünde / gewisse Gnade vnd Vergeltung / so warhafftig als Gott gerecht / trew vñ warhafftig ist.

Hierauff ist denn also förder der rhat leicht zu finden / wie ihm einer thun sol / der durch des Teuffels Betrug vnd schwachheit seines Fleisches in solche Sünde gefallen / vnd sich derhalben hoch bekümmert vnd vbel befindet.

Nemlich:

Für allen dingen muß er dem Teuffel vnd seiner Bapstischen Lügenrotten / zu der er sich vorhin gewendet / von stunde an vnd alsbald widerumb wirklich renunciren vnd absagen /

S ij

gen /

gen / ihr auch gar nicht mehr noch lenger nachfolgen / sondern
stracks zu seinem vorigen Glauben wiederumb greiffen vnd
Lehren / demselben Zeugniß geben / vnd ihn für die vnbillich
verleugnete heilige Göttliche Wahrheit bekennen. Wie denn
des waren erkandniß der Sünden vñ rechter rewe Art ist / daß
sie die einmahl zugelassene Sünde vnd Mißhandlung von Her-
sen hasser / die öffentlich vnd vngeschewet für gottlos bekens-
net / verflucht / absetzet / vnd ewiglich meidet. Denn es ges-
het gar mit nichten an / daß jemand Reue vnd Busse wolte für-
wenden / vnd dennoch nichts desto weniger / einen weg wie den
andern / in der begangenen Sünde beharren / vnd das vn-
rechte fortsetzen.

Nein: Reue vnd leid fürwenden vnd fort sündigen ist
wider einander. Dessen solt sich je ein jglicher selbst leicht-
lich berichten vnd weisen können. Denn auch Judas / der vn-
selige Verrhäter Christi / in seiner Reue nicht funde an der
begangenen Sünde hangend bleiben / sondern sein gewissen
zwang ihn / daß er das schendliche vnrecht öffentlich bekennen
vnd verfluchen mußte / mit wiederhinwerffung des Lohns der
vngerechtigkeit / welchen er darumb erworben / eingenom-
men vnd empfangen hatte.

Wo nun / sage ich / einer ist / dem sein Fall herzlich leid
ist / daß er ware Reue drüber hat / leffet auch derhalben wieder
vom heillosen verdampften Wapsthum / das er angenom-
men hat / vnd keret sich zu seinem alten rechten waren Glau-
ben / der sol ja bey Leib vnd Leben nicht verzagen / vnd sich we-
der seine eigene gedanken / noch den Teuffel / noch keinen
Menschen / noch keinen Engel / ja auch Gott selbst nicht (weil
er sich etwa dergleichen in seinem Befehle oder der heiligen
Schrifte vernemen liesse) dahin führen lassen / daß er achten
wolte / die Hoffnung der gnaden vnd Vergebung were auß
vnd verloren. Denn es helt sich im grunde warhafftig an-
ders

ders / wie das jeko auff das aller sterckeste aus der Schriffe
dargehan vnd erwiesen ist: Sondern er sol Gnade vnd Ver-
gebung in Demut / aber gleichwol getrost vnd in guter Zu-
versicht / bitten vnd suchen / die auch ergreifen / vnd feste hal-
ten / mit starckem Glauben / vnd sagen / wie Jacob / Gen. 32.
Ich lasse dich nicht / du segnest mich denn.

Denn das Wort helet vns solche Gnade für / wie ange-
zeigt / so klar vnd augenscheinlich / daß es niemand mit bes-
tande widersprechen noch leugnen kan.

Solches sind alle (die Anfechtung droh haben) zu thun
schuldig / sie habens Befehl / vnd ist ihnen ernstlich geboten /
vnd wenn sie es nicht thun / sondern verzweifeln / so handeln
sie erger / vnd sündigen damit viel höher / als sie zuvor durch
die Verleugnung vnd Abfall selber geihan haben.

Solches ist die gewisse vnd lautere Wahrheit / vnd sol-
len sichs auch alle / die betrübte vnd schwere Gewissen vber ih-
rem Abfall haben / halten / so wird es ihnen nimmermehr feh-
len / gewislich vnd Amen / Amen.

Niemand sündige ia vff Gnade /
Ihm kömpt sonst draus gewisser Schade /
In Sünden thue niemand verharren /
Er wird sonst gantz gefehrlich narren.
Busz sind Genad / das ist gewis /
Ja / wenn der Todteim weile lies /
Vnd Gott nicht etwa strafft zu letzt /
Wenn man zu weit hindan ihn setzt.

Thue Busz bey zeit /
Ehe dichs gerewt.

E N D E.

Wer ist vnter euch / der einen Thurn bauen will / vnd sitzet nicht zuvor vnd vberschleget die Kost / ob ers habe hinaus zu führen / auff das nicht / wo er den Grund geleget hat / vnd könne es nicht hinaus führen / alle die es sehen / fahen an sein zu spotten / vnd sagen: Dieser Mensch hub an zu bauen / vnd kan nicht hinaus führen. Oder / Welcher König wil sich begeben in einen Streit / wider einen andern König / vnd sitzet nicht zuvor vnd rathschlaget / ob er köndte mit zehen tausent begegnen / dem der vber in kömpt mit zwenzig tausent: Wo nicht / so schicket er Botschafft / wenn jener noch ferne ist / vnd bittet vmb Friede: Also auch ein jeglicher / der nicht absaget allem das er hat / der kan nicht mein Jünger seyn.

Das ist:

Wenn einer wil ein Christ werden / so muß er zuvor die Rechnung drauff machen (vnd ein weiser thut es auch) daß er gewiß werde verfolget werden / vnd leiden müssen. Muß sich derhalben prüfen / ob er auch könne oder wölle austawren: Gedenck: er das nicht zu thun / so ist es besser vorhin vperworren geblieben. Denn wenn man abfellee / ist es crger als wenn man nie darbey gewesen were / vnd wird ein Mensch zu schanden für Gott vnd der Welt. Darumb gehöret das darzu / wenn einer ein Christ wird / oder das Euangeliu annimpt / daß ers absage allem was er hat: Das ist / daß er alles dahin setze / schlage es in die Schanze / vnd erwege sich sein genzlich / daß ers könne lassen / wenn es die noth erfordert: Kan er das nicht / so ist er nicht ein Jünger für Christum / Denn dieselbigen müssen alle thun / weil sie alle der Verfolgung zu gewarten haben.

136 I. 60 147



65 A 4473

ULB Halle 3
001 940 112




56

1077







Sendbrieff 8. 7

Die Christen/

schon Wahrheit willen
get vnd verjaget
den/

fall vnd Verleugnung/
Sünde geschehe/ 2c.

beschrieben
zu Francken/ in der Verfol-
M. Alexander Beringer/
e zu Schmalkalden/

o in Druck gegeben/
bedrungen Evangelischen
vnd dergleichen Orten/
rch

ff/ Pfarrern/ Professorn
enten zu Leipzig.

s. cap.
strauchelnden Knie. Saget den verzagten
ucht/ Siehe ewer Gott der kömpt zur Rache/
euch helfen.

) S

oma Schürers S. Erken.
rich Lanckisch. 1622.